

«Nu sa ingio cha mia lavur am maina»

Flurina Badel ha survgni premi da promoziun

Daspö duos ons abita e lavura l'artista Flurina Badel a Basilea. Il premi da promoziun dal chantun Grischun dotà cun 20 000 francs survain ella güst in üna fasa particularmaing intensiva.

La nouva ch'ella survegna il premi da promoziun es gnüda Flurina Badel a savair per sms dad anteriurs cumpogns pro la Televisiun Rumantscha: «Amo avant co chi riva la charta dal Chantun m'hana scrit quista nouva chi m'ha fat grond plaschair», quinta l'artista, «eu mai nu vess insomma na spettà da survgnir quist premi, causa chi's cugnusch a mai in Grischun plüchöntscha sco schurnalista.» Il premi significha per ella bler: «Id es ün'arcugnuschentscha morala chi fa bain e chi'm motivescha d'ir inavant la via cha n'ha tschernü. I para chi interessa quai cha fetsch e quai cha creesch.» L'artista da Guarda manzuna cha quist premi saja gnü propcha precis al dret mumaint: «Eu n'ha uossa ün temp cha la lavur cun l'art va fich bain.» Flurina Badel prepara pel mumaint ün'exposiziun a Freiburg im Breisgau ed üna a Strassburg, quai chi tilla dà amo gronda lavur. «Quel chi expuona bler nu gudogna amo üna pruna, perquai am vesan mancà planet ils raps. Il plü tard in schner o favrer vessa stuvü tscherchar üna lavur in mia professiun da schurnalista.» Uossa invezza, grazcha al premi da promoziun ch'ella ha survgni d'incuort dal chantun Grischun, po Flurina Badel as dedichar plainamaing a la lavur artistica in seis atelier a Basilea.

Art veglia e contemporana

«L'art figurativa ch'eu fetsch es art contemporana in prüma lingia culla tecnica da rechamar», declera l'artista, «quista tecnica es vairamaing ter veglia, la lavur cun fil e textils es però üna fuorma d'art chi nun es amo uschè frequentainta.» L'avantag da quai saja chi's possa sviluppar amo novs motivs, novs metodos ed ir in tschercha da novs ideas, «sainza stuvair pensar cha tschientmillis d'artists hajan eir fingià fat quai». Davo avair abità e lavurà trais ons a Surcasti in Lumnezia ha decis Flurina Badel l'on 2010 d'ir a lavurar in cità: «Surcasti es stat il lö ideal per

reflettar davart mi'art e chattar mia via in quel regard, uossa però d'eira gnü il mumaint dad ir tanter la gliעד», disch l'artista onurada, «Basilea es propcha la cità da l'art, i sun qua prunas d'artists chi lavuran in lur ateliers, id exista eir üna gronda concorrenza.»

Parallelas da l'art al schurnalissem

Flurina Badel es creschüda sü per part a Lavin e davo a Guarda. «D'esser figlia d'ün artist sculptur e d'üna artischna m'ha fuormada fich», disch ella, «da meis bap n'haja survgni l'abilità da comunicar in oters möds co be cun peds.» Tenor ella daja eir oters möds per entrar in ün dialog ed otras perspectives co quellas chi's douvra i'l minchadi. Da sia mamma ha ella imparais a lavurar culs mans, «da savair comunicar eir be cun mezs redots.» Davo la matura tipus B cun latin ha ella fat viadis il prüm in Spogna, davo a Marocco. Davo avair fat üna scolaziun schurnalistica ha ella cumanzà a lavurar per Radio e Televisiun Rumantscha (RTR). «Eu sun ün uman fich bondrius, quai es la gronda parallela tanter il schurnalissem e l'art, eu poss dumandar, entrar in temas chi m'interessan e scuvrir alch per mai chi serva eir pel svilup da mia lavur artistica.»

Adüna darcheu eir a l'ester

Daspö s-chars desch ons fa Flurina Badel adüna darcheu viadis a l'ester per soggiorn d'ün pèr eivnas fin ün pèr mais: «Per mai es viagià üna scoula da la vita. Eu inscuntr üna pruna umans cun lur istorigas persunalas e scuvrisch uschea eir novs fassetas da mia persona.» Ad ella plascha eir da verer differents concepts da vita, da dudir differents opiniuns e tenutas e gnir a savair perche cha quists umans pensan uschea. Sch'ella es in viadi sta ella gugent eir ün pèr eivnas al medem lö: «Eu n'ha fich jent da pudair imprendere a cugnuscher il minchadi in ün oter pajais, otra cità. Eir là lavura, sco a chasa, vi da mi'art, simplamaing in ün ambiaint tuot different.» Uossa cumainza per la giuvn'artista üna nouv'esperienza: «Fin uossa nun haja mai pudü am dedichar uschè lösch a la lavur cun l'art, uossa n'haja grazcha al premi dal chantun Grischun quist'ocasiun», disch Flurina Badel, «eu nu sa ingio cha mia lavur am manarà in avegnir, eu sun be buonder.» (anr/fa)



Il clucher da la baselgia evangelica da Scuol sta simbolicamaing tort. La Corporaziun evangelica da Scuol e Tarasp es suot curatella. fotografia archiv: Nicolo Bass

Corporaziun evangelica suot curatella

Ingüns commembers nu's mettan a disposiziun pel consistori

Adonta da seis appel nun ha la Corporaziun evangelica da Scuol e Tarasp chattà ingüns commembers pel consistori. Per consequenza es la corporaziun gnüda missa suot curatella.

Insembel cun l'invid a la radunanza d'elecziun e da büdschet vaiva la Corporaziun evangelica Scuol/Tarasp trammis a sias commembras e commembers ün appel da's metter a disposiziun per pudair eleger ün nouv consistori. I d'eira da tscherchar successuras e successuors per Berta Burger, Michel Rauch, Flurinda Raschèr, Oscar Stupan e pel president Peter Langenegger. Els vaivan annunzchà lur desdittas fingià avant ün temp. In venderdi saira s'haja lura salvà la radunanza da büdschet e d'elecziun illa sala da la chasa da pra-

venda a Scuol. 24 personas d'eiran preschaintas.

Ingünas annunzchas o propostas

Il president scadent Peter Langenegger ha stuvü comunicar chi nu sajan entradas ingünas annunzchas da commembras o commembers chi füssan stats pronts da's metter a disposiziun pel consistori. Neir da vart da la radunanza nu sun gnüdas fattas ingünas propostas. Uschè es la Corporaziun evangelica Scuol/Tarasp uossa sainza consistori. Quai ha, sco cha Langenegger ha dit, per consequenza cha la Baselia evangelica chantunala elegia uossa ün curatur pella corporaziun evangelica. «Nossa corporaziun es uossa missa ad interim suot curatella», ha'l declerà, «las finanzas gnaran surdattas utrò, il curatur giarà eir in tschercha da commembras e commembers per fuormar ün nouv consistori da Scuol e Tarasp.»

Damain entradas d'imposta

Ün tema chi ardaiva eir ferm d'eira il büdschet 2013 e la dumonda schi saja necessari da dozar il pè d'impostas. Il büdschet pel prossem on prevezza ün s-chavd dad 80000 francs. «La raduschun per quist grond s-chavd sun las entradas chi s'han redüttas per bainquant», ha explic'hà Peter Langenegger, «il motiv principal sun las sortidas da commembers our da la corporaziun ed ils mortoris, üna part sun eir las consequenzas dals müdamaints da la ledscha d'impostas chantunala.» Perquai ha proponü il consistori scadent da dozar sco cusglià da rapreschantants da la Baselia evangelica chantunala il pè d'impostas per ses pertschient sün 20,5 pertschient dal pè simpel da las impostas chantunales. La gronda majorità dals preschaints a la radunanza da la corporaziun ha approvà quista masüra per limitar in avegnir ils deficits da la corporaziun. (anr/fa)

«M'annunzch fingià pel prossem cuors»

Bunas reacziuns a l'eivna da rumantsch a Sent

Ün'eivna a l'inlunga han 36 partecipants dal cuors da rumantsch a Sent discurrü be rumantsch. Amo avant co chi saja decis scha'l cuors vain repletti s'han ün pèr d'els fingià annunzchats pel prossem cuors.

«Desch, nouv, ot, set, sechs, fünf, vier...» Uschea han ils organisatuors dal cuors da rumantsch particular 'A Sent be rumantsch' in venderdi saira tut darcheu inavo l'impromischiun da las 36 partecipantas e partecipants dal cuors. Tschinch dis avant vaivan quels nempe impromiss da discurrer ün'eivna a l'inlunga be plü rumantsch. «Ils partecipants da nos cuors han propcha tut serius lur impromischiun ed han improvà da's dar d'incleger in otras manieras, sainza dovrar il tudais-ch», disch Cla Rauch, ün dals organisatuors dal cuors da rumantsch a Sent.

Tenor l'exaimpel da Vermont

L'idea da far a Sent ün cuors da rumantsch tuot particular vaiva gnü l'autura Angelika Overath chi abita a Sent cun seis hom Manfred Koch: «Nus d'eiran stats in Vermont i'ls Stadis Units da l'America i'l Middlebury College, ingio

chi vegnan sports cuors da differentas linguas, p.ex. frances, talian, ebraic, etc.», as regorda Koch, «d'ürant las set eivnas dal cuors pon discurrer ils partecipants be la lingua chi vöglian imprendere.» Tuornats in Engiadina Bassa ha sia duonna Angelika Overath proponü ad indigens activs illa vita culturala da far ün da quists cuors eir a Sent. Quels sun stats inchantats da quist'idea ed han scrit oura il cuors. Infra cuort temp hana survgni 36 annunzchas, la gronda part da la Svizra tudais-cha e ses personas da la Germania. «Nus vain chattà a Sent 35 famiglias chi han dat alloggi a las partecipantas e partecipants dal cuors», manzuna Cla Rauch.

Cuors, cultura e spassegiadas

L'avantmezdi han frequentà las 36 scolares e scolars ils cuors da rumantsch: Cla Rauch vaiva surtut ils principiants, Martina Noggler quels dal s-chalin duos, Corina Caviezel il s-chalin trais e Madlaina Rauch il s-chalin quatter. Il davomezdi e la saira sun gnüdas sportas differentas activitats per tuot ils partecipants. Il prüm di tils ha Cla Rauch manats tras il cumün da Sent, il seguond di hana cuschinà differentas specialitats engiadinaisais, ün di suna eir its a spass. «Ils butiers in cumün ans han eir sustgnüts, culs partecipants dal cuors hana discurrü unicamaing ru-

nantsch.» Üna saira hana chantà cun Benedict Stecher e Luis Cagienard chanzuns rumantschas, ün'otra saira ha prelet Cla Rauch poesias e raquints da Peider Linsel, Chasper Po, Luisa Famos, Men Rauch ed oters autuors da Sent e dals cumüns vaschins. «L'ultima saira vaina festagià il cuors insembel cullas famiglias ospitantas e cul chant e la musica da Men Steiner e la Chapella Tasna.» Implü ha la gruppa da Madlaina Rauch eir amo giovà il teater 'Il diavel illa chaldera'.

Reacziuns positivs eir in cumün

Sco cha Cla Rauch manzuna ha'l survgni da blers dals partecipants e-mails: «Els han lodà il cuors, scrit chi saja stat fich bel.» Quai chi til fa plaschair es ch'eir las reacziuns in cumün a Sent sun statts fich positivs. «A la gliעד ha nos cuors sco chi para eir plaschü bain, nus vain dudi blers lods per quist'occurrnza tuot speciala», disch el. In duos eivnas as chatta la gruppa d'organisaziun per üna sezzüda per verer co inavant: «Divers dals partecipants han dumandà scha nus repettan quist cuors, per part as laivna fingià uossa annunziar pella prossem'eivna da rumantsch a Sent», disch Cla Rauch, «perquai discutarana bainbod scha nus lessan spordscher il cuors eir quist on chi vain.» (anr/fa)



Flurina Badel da Guarda ha survgnü ün premi da promoziun dal chantun Grischun chi tilla permetta da viver inavant seis sömni.